



## 該年大地動

民國八十八年九月二十一，半夜一點四十七分七點三級个大地動，係臺灣个大劫難。幾下千人在九二一地動時失去親人同財產，這地動搖散撇幾多幸福个家庭，搖轉(zhon`)撇幾多大樓同屋舍，也改寫當多人个人生。

新曆九月天時，熱天个燒氣還未過，該暗晡嘎冷風颼颼滾，天頂係一種當深个藍色，天清清清，一層雲都無，東片析个天，還有金金、紅紅个霞光，係一種當怪奇个夜色。半夜，地動大力緊搖、緊搖、緊擢，同日睡覺个大家嚇醒，聽著滿哪乒乒砰砰、磬磬咁咁，櫥櫃、電視橫橫落來。鏡、玻璃爛撇聲，還合水塔橫撇个水流聲、大人喊細人噉，暗摸胥疏大家都去赴著鞋斯從緊出，吾等同鄰舍共下企在大路肩，又寒又驚、緊顫緊掣耐到天光。

天光咧，吾等正看著大家屋頂个水塔做下橫撇咧、水筴搖斷咧、水也流淨咧。鋁門窗同鐵門做下變形、玻璃爛淨淨，有兜柱樁也必縫。簷簷下个地泥裂開變做上下碇，社區个大路也必一條又大又深个縫，無法度行車。實在還得人驚！好好个屋變做恁泥，正經愛噉都無目汁哦！

里長伯來探大家，點啊點噉無看著戴在巷尾該隻泥磚矮屋个阿春伯婆同厥孫阿志，斯招鄰舍阿伯阿叔共下去搵尋。結果，噉看著阿春伯婆个屋轉撇、屋瓦塌落來，厥狗在屋簷這鼻該鼻，看著人來斯汪汪吠。里長伯緊喊阿春伯婆同阿志个名，做下無人應，逐儕斯遽遽搵手搬開層砵層个壁扇同磚瓦。地動還不時過搖下、擢下，搬開个屋瓦、磚截一下又過奔密咧。鄰舍聽著講，做下走來幫搵，人多好辦事，水大好行船，半點鐘過斯在橫落來个冰箱簷拉出昏撇个阿志。毋過，阿志頭那拓著緊流血，正脚个脚盤也著傷，愛遽遽送去醫院正使得。阿年叔無第二句，一下斯同阿志捉來背，阿桐伯也逐去，愛同阿年叔替換手。兩儕半行半走愛趕去五公里外个農民醫院。過點半鐘，尋著無故氣个阿春伯婆咧，逐儕聽著這消息，心肝頭撈撈撈，也有阿姨、伯姆目汁現跌落來，低聲道嘆人生無常。

阿志該年正六歲忒等，還在讀社區肚个噉咾園，厥爸厥姆在臺北食頭路，本本想等阿志愛讀國小該下正帶去臺北讀書。無想著，厥兩儕戴在臺北東星大樓，這地動也同厥等收撇去，阿志在這暗晡一下斯無撇三個至親，衰過正六歲子忒等，愛仰簷來面對厥个未來呢？

地動過撇後，政府開始調查人、屋受災个情形愛補助，社工、慈善團體也來關心還戴在醫院个阿志，想愛同佢安排去育幼院。毋過，厥有結婚个阿姑當擔輸贏，堅持愛照顧阿志，厥姑也恁泥到今無結婚，認真栽培阿志。阿志也當增志，大學官畢業斯考著公家機關个頭路，一畢業斯到稅捐處上班，將阿姑當做自家阿姆來有孝。

九二一地動過撇二十年咧，當年破碎个家園重新修整、起過，該當時个青驚同磨難、生離死別个艱苦也漸漸遠咧。外皮个傷口既經密合，心肝肚个傷痛還係不時會抽疾，毋過，人還係愛大步向前行，勇敢來面對生活中个各種挑戰，為自家个人生打拚。

作者：徐姿華

### ☆詞彙學習☆

【冷風颼颼滾】len+ fung+ siu` siu` gun`：冷

風直吹。

【搖】chug`：用力上下拋甩。

【擢】dui`：用力拉扯。

【從】zong`：快速行走。

【目睡覺】mug` shoi` gau`：睡夢中。

【柱樁】chu+ dun`：柱子。

【探】tam`：拜訪看望。

【層砵層】cen` zag` cen`：層層疊疊。

【噉咾園】gieu` zhi+ rhen`：幼兒園。